

ԹԵՂԵՆՅԱՅ ՎԱՆՔԸ ԻՔՐԵՎ ՄՇԱԿՈՒԹԱՅԻՆ ԿԵՆՏՐՈՆ

Վ. Մ. ՊԵՏՐՈՍՅԱՆՅ

Թեղենյաց վանքը, որ միջնադարյան Հայաստանի մշակութային նշանավոր օջախներից մեկն է եղել, գտնվում է Նաիրիի շրջանի Բուժական գյուղից՝ երեք կիլոմետր հյուսիս, թեղիներով շրջապատված բացատում։ Վանական այս համալիրը ճարտարապետական ինքնատիպ մտահղացմամբ բնությանը միաձուլված հուշարձան է, բաղկացած մի շարք շինություններից՝ կաթողիկե եկեղեցուց, դպրատուն-գրատնից, երկու գավիթներից, սեղանատնից, մատուռներից։

Կաթողիկե եկեղեցին վանական համալիրի առաջին կառույցն է։ Եկեղեցու շինության ժամանակի վերին սահմանը XII դարի վերջն է՝ 1198 թ., երբ այստեղ գրիչներ Թադեոսը և Վարդանը ընդօրինակել են «Մեկնութիւն Յովհաննու ավետարանի» ժողովածուն։ Ժողովածուի հիշատակարանում նրանք գրել են. «Գրեցաւ ձեռամբ Թադէոսի և Վարդանայ... ի թուականիս Հայոց Ռոնէ (1198), ի սուրբ յանապատիս Թեղենիս, ի սուրբ կաթողիկէ դրանս»²։ Եկեղեցին ամբողջովին ավերվել ու ծածկվել էր հողի մի քանի մետր հաստության շերտով։ Վերջին երկու տարվա ընթացքում այստեղ կատարված պեղումների շնորհիվ շինությունն ամբողջովին բացվել է³։ Լավ պահպանված հիմքերը թույլ են տալիս ասելու, որ կաթողիկե եկեղեցին միջին չափի կենտրոնազմբեթ շէնք է։ Եկեղեցու սրածայր վեղարը նստած է եղել չորս հիմնասյուների թռիչքներից զոյացած շրջանաձև հիմքի վրա։ Պատերը շարված են կարմրագույն տուֆի լավ մշակված քարերով։ Պահպանվել են շքամուտքի (արևմտյան կողմում) և հարավային մուտքի ներքին հատվածները, որոնց վրա քանդականախճեր են փորագրված։

Համալիրի երկրորդ շինությունը՝ դպրատուն-գրատունը կառուցվել է կաթողիկե եկեղեցու հարավային կողմում՝ ամբողջ պատի երկարությամբ և եկեղեցու հետ հաղորդակցվում է հարավային մուտքով։ Այն ուղղանկյուն շենք է, ներսից բաժանված է երեք հատվածների։ Միջին մասը զբաղեցնում է միջանցքը, որը մի կողմից դռնով հաղորդակցվում է կաթողիկե եկեղեցու հետ, իսկ հարավային կողմում ելք ունի դեպի դուրս։ Շենքի արևելյան կողմում գտնվում են բարակ պատերով իրարից բաժանված երեք փոքր ավանդատներ, որոնք ունեն պայտաձև խորաններ և հավանաբար ծառայել են որպես զրչանոցներ։ Միջանցքի արևմտյան կողմում կառուցված են երկու սենյակներ, որոնցից մեկը ուղղանկյուն է, ընդարձակ, իսկ մյուսը՝ ավելի փոքր։ Շենքը մուգ կարմիր տուֆից է։ Դպրատուն-գրատուն մուտքը նույնպես շքեղորեն հարդարված է. երկու կողմերում կան երկհատված գոգավոր կիսա-



1 Բուժական (Նախկին Բաբաբիշի) գյուղը մտել է պատմական Նիզ գավառի (Ապարան) կազմի մեջ։ 1978 թ. հոկտեմբերի 25-ին ՀՍՍՀ Գերագույն սովետի հրամանագրով միացվել է Նաիրիի շրջանին։

2 Ղ. Ալիշան, Հայապատում, Վենետիկ, 1901, էջ 371։

3 1980—1981 թթ. Թեղենյաց վանքում պեղումներ է կատարել ՀՍՍՀ ԳԱ հնագիտության և ազգագրության ինստիտուտի գիտաշխատող, վիճագրագետ Գ. Սարգսյանը։

սյունների հիմքեր: Այս շինությունը ևս բացվել է պեղումների ընթացքում: Հավանաբար դպրատուն-գրատունը կառուցվել է կաթողիկե եկեղեցու հետ միաժամանակ կամ մի փոքր ավելի ուշ, բայց բոլոր դեպքերում XII դարից ոչ ուշ:

Առաջին կիսականգուն գավիթը կառուցվել է կաթողիկե եկեղեցու արևմրտյան կողմում: Պահպանվել է կենտրոնական հատվածը, հարավային



Թեղեկյաց վանքի համալիրը. 1. Կաթողիկե եկեղեցի: 2. Գրատուն-դպրատուն: 3. Առաջին գավիթ (1207): 4. Երկրորդ գավիթ (XIII դ. սկիզբ): 5. Սեղանատուն (XIII դ. սկիզբ): Չափազրությունը՝ Վ. Պետրոսյանցի

Թեղեկյաց վանք. 1207 թ. Վահրամ Չավուշի կառուցած առաջին գավիթը

պատնեհը գմբեթածածկը քանդված են: Հյուսիսային պատի վրա կա շինության մեկենաս Վահրամ Չավուշի արձանագրությունը⁴, որի համաձայն գավիթը կառուցվել է XIII դարի առաջին տասնամյակում: Այն պատկանում է միջնադարյան Հայաստանում խիստ տարածված քառասյուն գավիթների տիպին: Գորշ գույնի բազալտից պատրաստված, 91 սանտիմետր տրամագիծ ունեցող շորս սյուները իրենց վրա են կրել գավիթի գմբեթածածկը: Շինության ճարտարապետը վարպետորեն համադրել է սե և կարմիր տուֆը. ութանիստ գմբեթահիմքը հենց այդ գույների շախմատաձև տեղադրությամբ մեծ հնչեղություն է ձեռք բերել: Այս գավիթի կառուցվածքային առանձնահատկությունները ուսումնասիրել է Ս. Մնացականյանը⁵:

Երկրորդ գավիթը գտնվում է առաջինի հյուսիսային պատին կից: Այն առաջով ամբողջովին ծածկված է հողով: Բացված են միայն սյուների մի մասն ու խոյակները: Կարծում ենք, որ այս գավիթը կառուցվել է հիմնականում որպես ռեստավրացիոն մասնաշենք: Այդպիսի ուսումնական մասնաշենք-գավիթներ են կառուցված Հաղբատում, Սանահնում, Սաղմոսավանքում:

Ինքնատիպ շինություններից է վանական համալիրի հյուսիսային կողմում գտնվող սեղանատունը, որի հյուսիսային պատնե է միայն պահպանվել. կառուցվել է XIII դարում, հավանաբար մինչև 1230-ական թթ., մինչև մոնղոլական արշավանքները: Պահպանված հատվածի հիման վրա կարելի է ասել,

⁴ Գ. Սարգսյան, Արձանագրություն Թեղեկյաց վանքից, ՀՍՍՀ ԳԱ «Լրաբեր հաս. գիտ.», 1977, № 8, էջ 102:

⁵ Ս. Մ. Մնացականյան, Архитектура армянских притворов, Ереван, 1952, с. 37—39.

որ այն ներսից բաժանված է երեք մասի, թուիքներն իրականացված են լավ մշակված բաղալտե կիսասյուներով և զորշավուն տուֆով: Շենքի երկրորդական մասերում օգտագործվել են անմշակ քարեր⁶: Վանքից երկու տասնյակ մետր դեպի արևելք, հողով ծածկված մատուռների շրջապատում երևում են կացարանների հիմքեր: Վանքից հյուսիս, անտառի մեջ գտնվում է գերեզմանոցը:

Թեղենյաց վանքի մասին առաջին հիշատակությունը վերաբերում է VIII դարի առաջին քառորդին: 727—728 թթ. այստեղ որոշ ժամանակ պատսպարվել է Վահան Գողթնեցին⁷:

Թեղենյաց վանքի մշակութային կյանքի մասին առաջինը հիշատակում է Ասողիկը: Նա գրում է, որ իր ընկերներից Երեմիան Թեղենյաց վանքի վանահայրն էր, և այդ տարիներին վանքում ասլրում ու ստեղծագործում էր Կիրակոս գիտնականը: Ասողիկը գրում է. «Եւ Կիրակոս գծծակերպ գիտնականն, որ վարուք առաւել քան թէ բանիւք վարդապետէր. որ բնակէր յովվակի յանապատին, որ Թեղենիսն կոչի, ի Նիգ գաւառի, առ հօր Երեմիայի ճրգնաւորին Քրիստոսի և ընկերակցի իմոյ»⁸: Կիրակոս գիտնականի մասին մենք ուրիշ տեղեկություններ չունենք:

X դարի վերջերից սկսած Թեղենյաց վանքում գործել է դպրատուն-գրատուն: Վանքի դպրանոցում ուսումնասիրվում էին աստվածաբանների, քերականների աշխատությունները, դրանց շուրջ ստեղծված մեկնողական երկերը: Դպրանոցի ուսումնական ժողովածուներից մեկի մասին տեղեկություններ է տալիս Ղ. Ալիշանը: Ձեռագիրը՝ «Մեկնութիւն Յովհաննու ավետարանի» ժողովածուն⁹, ինչպես վերը նշվեց, 1198 թ. արտագրել են Թադեոս և Վարդան գրիչները: Նրանք իրենց հիշատակարանում գրել են. «Կատարեցաւ հոգեւորոգ տառս մեկնութեան սուրբ ավետարանին Յովհաննու, զոր կարգեալ և յղեալ բազում աշխատութեամբ մեծի իմաստնոյ Սարգիս կոչեցեալ, աշակերտ երիցս երանեալ սուրբ վարդապետի Սարկաւազ կոչեցեալ, որ և նմա համոզեալ ի սոյն խորհրդի, ժողովեալ բանս պատշաճաւորս յաղագս օգտի լսողաց և ուսումնասիրացն ընթերցողաց: Բայց հաւաքեալ են աստ բանք պիտանիք ի վարդապետութենէ Սրբոյն Եփրեմի, և Ոսկեբերանի, և Տեառն Ստեփաննոսի Սիւնեաց վերադիտողի, և ի տեղիս տեղիս՝ Աստուածաբանի, և Սարկաւագի, և Անանիայի, և Իգնատիոսի, և սկիզբն ի Նանաէ, սակաւ մի և ի Սեբերիանոսէ՝ ի մէջ քրիստոսասիրացն սուղ ինչ վկայութիւն»¹⁰:

Այս հիշատակարանից տեղեկանում ենք Թեղենյաց վանքում ստեղծագործած գիտնականի՝ Սարգիս իմաստասերի մասին: Նրա ուսուցիչը եղել է Սարկաւագ վարդապետը, որի խորհրդով էլ Սարգիսը կազմել է «Մեկնութիւն Յովհաննու ավետարանի» ժողովածուն: Հայտնի է, որ միջնադարի մեծագույն մտածողներից մեկը՝ գիտնական, փիլիսոփա, տոմարագետ, բանաս-

⁶ Օ. Խ. Խալպախչյան, Гражданское зодчество Армении (Жилые и общественные здания), М., 1971, с. 161—171.

⁷ «Ճառ սրբոց վկայիցն ճշմարտին Աստուծոյ... որ կոչի Յայսմաւորք», Կ. Պոլիս, 1706, էջ 622: Վ. Մ. Պետրոսյան, Թեղենյաց վանքը և նրա առաջնորդները, «Էջմիածին», 1977, օգոստոս, էջ 48:

⁸ «Ստեփաննոսի Տարօնեցոյ Ասողկան պատմութիւն տիեզերական», Ս. Պետերբուրգ, 1885, էջ 185: Ասողիկն ապրել է X դարի վերջին և XI դարի սկզբին, հետեւաբար Կիրակոս գիտնականը ևս ապրել է այդ ժամանակահատվածում:

⁹ Ղ. Ալիշան, Հայապատում, էջ 371:

¹⁰ Նույն տեղում:

տեղծ, մատենագետ Հովհաննես Իմաստասերը ևս կոչվել է Սարկավագ: Նկատի ունենալով անունների այս նմանությունը, Ա. Գ. Աբրահամյանը «Հովհաննես Իմաստասերի մատենագիտությունը» աշխատության մեջ այն կարծիքն է հայտնել, որ Սարգիսը Հովհաննես Սարկավագի աշակերտն է¹¹: Բայց Հովհաննես Սարկավագի և հիշատակարանի Սարկավագ վարդապետի գործունեության ժամանակի ղգալի տարբերությունը ստիպում է մտածել, որ նրանք տարբեր մարդիկ են: Հովհաննես Սարկավագը մահացել է 1129 թ. և թաղվել է Հաղբատում: Սարգիս Իմաստասերը գործել է դարի վերջին. 1198 թ. նրա կաղամած, ուղղած, խմբագրած տեքստը արտագրել են Թադեոս և Վարդան գրիչները: Այս թվականների միջև եղած տարբերությունն արդեն կազմում է 69 տարի՝ մի ամբողջ կյանք: Ուղղակի Սարգիսը աշակերտեր Սարկավագին, առնվազն պետք է լիներ 20 տարեկան, ուսումն ավարտելիս՝ մոտ 26—27 տարեկան: Նման ղեպքում ժողովածուն կազմելիս նա արդեն մոտ 100 տարեկան մի մարդ պիտի լիներ, որ անհավանական է: Հետևաբար, Հովհաննես Սարկավագին չպետք է նույնացնել Սարգիս Իմաստասերի ուսուցիչ Սարկավագ վարդապետի հետ: Երկրորդ Սարկավագը հավանաբար գործում էր նաև ժողովածուն կազմելու ժամանակ՝ 1190-ական թթ.: Միաժամանակ անհավանական է, որ ժողովածուն արտագրվելու ժամանակ Սարգիսը մահացած լիներ. քանի որ գրիչները հայտնում են, որ ժողովածուի նյութերը նա այդ ընթացքում է կազմել, ուղղել, խմբագրել: 1198 թ. հիշատակված Սարգիս Իմաստասերը կարող է նույնը լինել Թեղենյաց վանքում 1168—1169 թթ. հիշված Սարգսի հետ: Այս երկրորդ Սարգիսը 1168—1169 թթ. Թեղենյաց վանքում հյուրընկալել է էպու Պէթր անունով պարսիկին, որ քրիստոնեություն էր ընդունել ու դարձել Հովսեփ Դվնեցի: Ղ. Ալիշանը գրել է, որ Հովսեփ Դվնեցին «...թողլով ծնողաց տունը՝ նոր Վահանայ Գողթնացոյ մը նման՝ դնաց ուխտաւորի պէս այն ատենուն Հայոց ամեն երևելի վանքերը պտտեցաւ. սկսեալ ի Թեղենեաց...»¹²:

Թեղենյաց վանքում պատշաճ կարգով պահվում էին հայկական եկեղեցու պաշտամունքային կարգերը, այն դեպքում, երբ ժամանակի մյուս եկեղեցիներում դրանք խախտվել կամ մի կողմ էին թողնվել: XII դարի երկրորդ կեսին Ներսես Շնորհալին (1166—1173) որոշում է ուղղել հայկական եկեղեցու խաթարված ժամակարգը: Կաթողիկոսը տեղեկանում է, որ հայոց հայրապետների կարգադրությունները հավատարմորեն պահվում են Մեծ Հայքի երկու վանքերում՝ Թեղենյաց և Մաքենացոց վանքերում: Ներսես Շնորհալին, քննելով Թեղենյաց և Մաքենացոց վանքերի ժամակարգերը, լրացնում է, ամբողջացնում և հանձնարարում համայն հայկական եկեղեցիներին. «...Իսկ Թեղենիք՝ Նիգ գաւառին մէջ էր, Երևանայ մօտերը, որ և աւելի անցուղարձի տեղ ըլլալով՝ աւելի ալ ոտնակոխ, եւս իր ամենէն պայծառ ատենն էր: Այս երկու վանքերուն (Թեղենյաց և Մաքենացոց—Վ. Պ.) և ուրիշ տեղեաց արարողութիւնները բաղդատելով. «և ամենայնիւ կամօք հաճեալ և հաւանեալ, ղպակասն ելից և զսխալն ուղղեաց, և կարդեաց ամենայն Հայաստանեայց եկեղեցոց՝ անշրելի և հաստատուն աւանդ...»¹³:

11 Ա. Գ. Աբրահամյան, Հովհաննես Իմաստասերի մատենագիտությունը, Երևան, 1956, էջ 29:

12 Ղ. Ալիշան, Շնորհալի եւ պարագայ իւր, Վենետիկ, 1873, էջ 390:

13 Նույն տեղում, էջ 442:

XIII դարի սկզբներին Թեղենյաց վանքը ղեկավարում էր ժամանակի նշանավոր ու ճանաչված վարդապետներից մեկը՝ Տուրքիկ վարդապետը, որի մասին տեղեկացնում է Կիրակոս Գանձակեցին: Ինչպես հայտնի է, 1205 թ. Զաքարե Բ Մեծը իր ջախջախում գումարում է Արևելյան Հայաստանի եկեղեցականների ժողով՝ հաստատելու համար Սսի եկեղեցական ժողովի որոշումներն ու կանոնները շարժական սեղանի թույլտվության մասին, որպեսզի ղորականները ևս պատարագի հնարավորություն ունենան: Լուրի ժողովին մասնակցում են ժամանակի բոլոր նշանավոր եկեղեցական, հասարակական գործիչները: Կիրակոս Գանձակեցին գրում է, որ Մխիթար Գոշի, Իզնատիոսի, Դավթի, Հովհաննեսի և մյուսների հետ այդ ժողովին մասնակցում էր նաև «Տուրքիկն ի Թեղենացն, որ բարոք կարգաւորեաց զվանքն՝ զամենայն ինչ հասարակաց լինել և առանձին ոչ ինչ ստանալ»: Հայտնի է, որ եկեղեցական գործիչներն անմիաբանություն հանդես բերեցին և, առանց որևէ գործնական եզրակացության հանգելու, ցրվեցին: Երկու տարի անց, 1207 թ. Զաքարե Բ-ն եկեղեցական նոր ժողով է գումարում իր աթոռանիստ Անի քաղաքում: Կիրակոս Գանձակեցին այս անգամ չի նշում ժողովի մասնակիցների անունները, այլ գրում է, որ Զաքարե Բ-ի հրամանով Անիում «ժողովեցան վերոգրեալ եպիսկոպոսքն և վարդապետքն և ևս յոյովք»¹⁴: Հետևում է, որ լուրի ժողովի բոլոր մասնակիցները, այդ թվում Տուրքիկ վարդապետը, մասնակցել են նաև Անիի ժողովին:

Տուրքիկ վարդապետի օրոք է կառուցվել Թեղենյաց վանքի առաջին կամ հիմնական գավթի: Գավթի կառուցման պատիվը պատկանում է Վահրամ Չավուռին: Այդ մասին տեղեկանում ենք գավթի հյուսիսային պատի վերին աջ անկյունում 1207 թ. (երբ գումարվել է Անիի ժողովը) փորագրված արձանագրությունից. «Թ. Թուականութե[ան]ս հայոց ՈՄՁ (1207): Ես՝ Վահրամ Չավուռ, որդի Պատրոնկան էտու [յ]արդեանց իմոց աւգնութե[ա]ն ի շինութե[ա]ն գավթին...»¹⁵: 1211 թ. Թեղենյաց վանքին նվերներ է տվել երկրամասի նոր տիրակալ Վաչե Վաչուտյանի կինը՝ Մամախաթուն: Իշխանուհին Հենց այս թվականներն էլ (1207—1211) ամենայն հավանականությամբ պետք է լինեն գավթի կառուցման և օծման տարիները:

Առաջին գավթի կառուցումը՝ վանքի ընդարձակումը, ենթադրել է տալիս, որ այդ ժամանակ վանքի միաբանությունը բավական մեծաթիվ էր: Հավանաբար հենց այդ ժամանակ է առաջացել նաև երկրորդ գավթի և սեղանատան անհրաժեշտությունը, որոնք կառուցվել են կամ Երազին գավթի հետ միաժամանակ, կամ անմիջապես հետո:

Թեղենյաց վանքում իրենց գործունեությունն են ծավալել մեր մշակութային ականավոր ներկայացուցիչներ Վանական վարդապետը (1246 թ. հետո) և վարդան Արևելցին: Վերջինս 1267 թ. այստեղ է փոխադրվել իր դպրոցի հետ: Վարդան Արևելցու աշակերտներից Գևորգ Սկևռացին Թեղենյաց վանքում ավարտած ձեռագրի հիշատակարանում գրել է. «Եւ անտի (նոր Վերապից—Վ. Պ.) փոխեալ եկեալ առ մեծ իշխանն Քուրդ՝ և մեր զկնի նորա հետեալ ժամանակ ինչ արարաք յանուանեալն Սաղմոսավանք, ուր և զառաջինն աւարտեցաք հատոր բոլոր մատենիս: Եւ քանզի դէպ լինէր և անտի ևս փոխիլ նմա ի գործ բարոք ուսուցչութեանն ի տեղի ուր տէր յաջողեսցէ՝ յու-

¹⁴ Կիրակոս Գանձակեցի, Պատմություն հայոց, աշխատասիրությամբ Կ. Ա. Մեմլեք-Օհանջանյանի, Երևան, 1961, էջ 171—172, 174:

¹⁵ Գ. Սարգսյան, Արձանագրություն Թեղենյաց վանքից, էջ 102:

ղարկեալը եղևալ մէր ի ստացողէ տառիս ի բուն տունս իւրեանց ի մէծահոշակ հրեշտակակրան աստուածաբնակ սուրբ ուխտս Թեղինեաց, ուր և յանկ իսկ հանաք զառաջարկեալս, բարոք ընկալեալ զմեզ բարեբարոյ և սրբաասէր քահանայի Սարգսի, սիրով և յաւժարամիտ կամաւը սպասաւորելով, զոր աղաչեմ յիշման բարույ սրժանի առնել...»¹⁶:

Գևորգ Սկևռացին Թեղենյաց վանքում զբաղվել է ձեռագրի կատարելագործմամբ: Վերը բերված հիշատակարանում նա նշում է, որ այդ գործում իրեն օգնել է Սարգիս քահանան:

Գևորգ Սկևռացու հիշատակարանում նշված է, որ որտեղ էլ հասսուտվել է ուսուցչապետ Վաբդան Արևելցին, ծախսել է մանկավարժական աշխատանք: Հիշատակարանից իմացվում է նաև, որ ձեռագրի երկրորդ մասն ամբողջովին գրվել է Թեղենյաց վանքում: Այդ ձեռագրի մասին Գալուստ Տեր-Մկրտչյանը գրում է. «Ընտիր գրչություն է, բոլորգիր, գլխակարգությունները կարմրագեղով»¹⁷: Ձեռագրի Թեղենյաց վանքում ստեղծված մասում (474թ թերթ) Գևորգ Սկևռացին զետեղել է լեզվի և հատկապես կազմության տեսակետից ինքնատիպ մի ոտանավոր-ակրոստիքոս: Ոտանավորի առաջին սյան յուրաքանչյուր երկրորդ տողի առաջին տառերով կարդացվում է «ԳԵՈՐԳ ՊԱՏԱՆԻՆ Է ԳՐԵԱՅ», երրորդ սյան նույն տողերի վերջին տառերով՝ «ԳՐԻԳՈՐԻ ՎԱՐԳԱՊԷՏԻՆ»¹⁸: Գևորգ Սկևռացու ձեռագիր մատյանն այժմ պահվում է Մաշտոցի անվան Մատենադարանում¹⁹: Ձեռագրի ավարտի թվականը՝ 1267, միաժամանակ թույլ է տալիս եզրակացնելու, որ Վաբդան Արևելցին իր հայտնի «Մեկնութիւն Դանիելի մարգարէի» գործը մասամբ գրել է Թեղենյաց վանքում:

Թեղենյաց վանքի դպրանոցի հայտնի շրջանավարտներից է գրիչ, բանաստեղծ Տերտեր Երևանցին²⁰: Նրա ուսումնառության տարիները կարող են տատանվել 1310—1320-ական թթ. միջև: Այդ շրջանում վանքի դպրանոցը ղեկավարել է Հակոբ վարդապետը²¹: Մոնղոլական բռնատիրության օրավուր սաստկացող հալածանքները Տերտերին ևս ստիպում են բռնելու պանդխտության ուղին: 1330—1340-ական թթ. նա ապրում է Ղրիմի տարբեր քաղաքներում և հիմնականում զբաղվում է ձեռագրերի ընդօրինակությամբ: Տերտերը 1336 թ. Սուրխաթ քաղաքում արտագրում է «Ժողովածու քարոզից Վարդանայ Այգեկցւոյ», «Ժողովածու խրատուց», «Քարոզգիրք Վարդանայ Այգեկցւոյ», 1341 թ. Ալախ քաղաքում՝ «Քարոզգիրք Վարդանայ Այգեկցւոյ» ժողովածուները: Այդ ձեռագրերն այժմ պահվում են Մաշտոցի անվան Մատենադարանում²²: Տերտեր Երևանցին գրել է մի հետաքրքրական պոեմ՝ խաղողի, գինու և իմաստասերի վիճաբանության մասին²³:

16 Գ. Տեր-Մկրտչյան, Հայագիտական ուսումնասիրություններ, գիրք Ա, Երևան, 1978, էջ 282:

17 Նույն տեղում, էջ 278:

18 Նույն տեղում, էջ 280:

19 «Ցուցակ ձեռագրաց Երևանի Մատենադարանի», հ. Ա, Երևան, 1965, էջ 1252:

20 «Հայ ժողովրդի պատմություն», հ. 3, Երևան, 1976, էջ 865:

21 Հավանաբար այս նույն Հակոբ վարդապետն է Թեղենյաց վանքի արևմտյան կողմում, ձորալանջի փոքրիկ բացատում խաչքար կանգնեցրել, որի պահպանված պատվանդանին փորագրված է. «Այս նշան Տեառն Հիսուսի խաչին արքային կանդնեալ ի բարեխաւութեն Հակոբոս վարդապետին»: Արձանագրությունը մեղ է տրամադրել Գ. Մարգարյանը:

22 Մաշտոցի անվ. Մատենադարան, ձեռ. №№ 1654, 8029, 8030, 8281: Տե՛ս «ԺՂ դարի հայերեն ձեռագրերի հիշատակարաններ», կազմեց Լ. Ս. Խաչիկյանը, Երևան, 1950, էջ 286—288, 328—329:

23 «Հայ ժողովրդի պատմություն» հ. 3, էջ 865:

Թեղենյաց վանքում գործել են շատ գրիչներ: XIII դարի առաջին կեսի վերջից և երկրորդ կեսից հայտնի են Նահապետը, Քահանան, Շմավոնը, Դավիթը²⁴: Քահանան և Շմավոնը եղբայրներ են, իսկ Նահապետը նրանց հորեղբայրն է: Նահապետն է վանքի կամարների տակ սնուցել նրանց, հասցրել քահանայության աստիճանի: Երբ Նահապետը մահացել է, եղբոր որդիները նրա գերեզմանին գեղաքանդակ խաչքար են կանգնեցրել: Թեև խաչքարը կոտրված, մասերի է բաժանված, բայց լավ պահպանվել է խաչքարի սյուտվանդանը, որի վրա փորագրված է. Ի թվ[ին] ԶԺԵ (1266): Յուսով անմահին / Ա[ստուծո]յ Քահանայս եւ եղբայ[ր իմ Շ] / մաւոն կանկնեցաք զխաչս ի բար[է]խաւսութ[ի]ւն Նահապ[ետ]ին և մեզ: Որք/կարգայք զմեզ յիշեցէք ի Ք[րիստո]ս:

Նահապետի մահից՝ 1266 թ. հետո, նրա հիշատակը հավերժացնելու նպատակով, Քահանան սկսում է ավետարան ընդօրինակել, սակայն չի հասցրնում ձեռագիրն ավարտել՝ մահանում է: Եղբոր գործը շարունակում է Շմավոնը: Նրան օգնում է Դավիթ կրոնավորը: 1295 թ. նրանք միասին ավարտում են ավետարանի ընդօրինակությունը²⁵: Ձեռագիրն այժմ պահվում է Բրիտանական թանգարանում²⁶:

1302 թ. Մկրտիչ Րաբունին Թեղենյաց վանքում ընդօրինակում է «Մեկնութիւն սաղմոսաց Ներսիսի Լամբրոնացույ» գրչագիր աշխատությունը: Այս ձեռագիրը մի մեծ հատոր է (673 թերթ, 21×14 սմ), գիրը՝ միասյուն, բոլորգիր: Թուղթը օսլայած է: Խոսելով այդ գրչագիր ժողովածուի գրվելու հանգամանքների մասին, Մկրտիչ Րաբունին նշում է, որ այն սկսել են գրել միջնադարի հռչակավոր մշակութային օջախներից մեկում՝ Գլաձորում, ուսուցչապետ Եսայի Նչեցու հանձնարարությամբ: Ձեռագրի առաջին գրիչը՝ Հովհաննես Երզնկացին գրել է միայն Ներսես Լամբրոնացու սաղմոսների մեկնության մի մասը: Այդ գլխի շարունակության մի փոքրիկ մասն էլ գրել են Վարդան Երզնկացի և Վարդան Կիլիկեցի գրիչները: Մնացած ամբողջ աշխատանքը կատարել է Մկրտիչ Րաբունին²⁷: Իր մասին նա ընդամենը հետևյալն է հայտնում. «Թարմատար և անարհեստ գրչի Մկրտիչ կոչեցեալ. անուամբ միայն ըսելի, ի սոյն անապատէ» (խոսքը Թեղենյաց վանքի մասին է՝ Վ. Պ.): Այս փոքրիկ տեղեկությունը թույլ է տալիս ասելու, որ Մկրտիչը եղել է ընդունի, այսինքն վարդապետ-ուսուցիչ: Գործերի Հովսեփյանը, հենվելով Մկրտիչ Րաբունու հայտնած այն տեղեկության վրա, որ ինքը աշխատության գրչագրությունը հանձն է առել միայն այն պատճառով, որ վայելել է մեծ ուսուցչապետի հովանավորությունը և չի կարողացել հրաժարվել նրա խնդիր-պահանջից, եզրակացրել է, որ նա Գլաձորի համալսարանի սաներից է: Բայց ավելի հավանական է, որ Մկրտիչը լինելու հենց Թեղենյաց վանքի դպրանոցի սաներից: Չի բացառվում, որ Թեղենյաց վանքի դպրանոցն ավարտելուց հետո Մկրտիչը կարող էր վարդապետական կոչման համար պատրաստության որոշակի շրջան անցնել Գլաձորի համալսարանում և վայելել Եսայի Նչեցու «յուրով խնամս»:

²⁴ Հ. Ա. Տառյան, Անձնանունների բառարան, Երևան, հ. Բ, 1944, էջ 45, հ. Դ, 1948, էջ 168, հ. Ե, 1962, էջ 213—214:

²⁵ «A Catalogue of the Armenian manuscripts an the British Museum», by F. C. Conibeaere, London, 1913, p. 16.

²⁶ Նույն տեղում, էջ 17:

²⁷ «ԺԴ դարի հայերեն ձեռագրերի հիշատակարաններ», էջ 5—7:

Անդրադառնալով այդ ձեռագրին Գ. Հովսեփյանը գրել է. «Հակառակ յուր համեմատութեան, երևում է ոչ համբալ, այլ արդեն «րաբի» (րաբունի), այսինքն վարդապետ-ուսուցիչ և գրչության մեջ ընտիր և անսխալ... Հիշատակարանի շարադրությունը մաքուր և լավ գրաբարով, հրահանգված մաքի արդյունք, իսկ գրչությունը գեղեցիկ»²⁸:

Մկրտիչ Րաբունին իր ընդարձակ հիշատակարանի վերջում հետաքրքիր տեղեկություն է հայտնում Թեղենյաց վանքի մասին: Նա նշում է, որ աշխատությունն արտագրելու ընթացքում, այլ հանգամանքների շարքում, իրեն խանգարել է «...ևս և աղմուկ դրուցաց յուրվ լինէր մերձ իմ, յորմէ սխալէի, վասն որոյ և ոչ կարողանայաք ճահողակի հանդիպիլ ի գործ արհեստիս»: Հետևում է, որ այդ ժամանակ XIV դարի սկզբներին ևս Թեղենյաց միաբանությունը մեծ էր, այդտեղ սյնքան վանականներ, գրիչներ, դպրանոցում սովորողներ կային, որ նրանց զրույցները խանգարում էին Մկրտիչ Րաբունուն հաճախակի զբաղվելու իր արհեստով՝ գրչությամբ: Այս գրչագիր մատյանն այժմ պահվում է Մաշտոցի անվան Մատենադարանում և կրում է 6558 թվահամարը²⁹:

Պահպանված հատուկենտ ձեռագրերի հիշատակարաններից իմացվում է, որ դրանց գրվելուն նպաստել են քահանաներ Սարգիսը, երկու Հովհաննեսները, Վրթանեսը, դպիր Սարգիսը: Մկրտիչ Րաբունին իր հիշատակարանի վերջում ընթերցողներից խնդրում է «Յիշեսցիք, աղաչեմ և զՅովանէս և զՎրթանէս սրբասէր քահանայք, որք և հարազատք [են] իմ և սպասաւորք, ևս և զպատանիս՝ զՍարգիս դպիր, որ յուրվ սպասաւորեաց մեղ»³⁰:

XIII—XIV դդ. Թեղենյաց վանքի հռչակը մեծ էր: Գևորգ Սկեռացին այն անվանում է «մեծահռչակ հրեշտակակրան աստուածաբնակ սուրբ ուխտս Թեղինեաց»: Մկրտիչ Րաբունին այն կոչում է «գերահռչակ սուրբ ուխտս»:

Գավթի պատէրին, եկեղեցու քարերին շատ նվիրատուական արձանագրություններ են փորագրված: Նվիրատուների թվում են Քուրդ Վաչուտյանն ու իր կին Խորիշահը, Վեցիկը³¹, Հովհաննես Խաչենցին, Խնկիկը, Սաթերը, Սըմբատի որդի Քուրդը և իր կին Տիկնաց տիկինը (1360): Վանքի գերեզմանոցում են թաղված Սարգիս երեցը (+1090), Վարդան քահանան «որ էր ի Կէսարացոց գաւառեն» (+1210), Բռնան (+1224), Հայրապետ քահանան (+1278), Էրկաթի որդի Հովհաննես կրոնավոր Լոռեցին, Գորգ քահանա Վալադեցին, մեկ այլ Վարդան քահանա, որի տապանաքարը կամ տապանագիրը պատրաստողը փակագրով թողել է իր անունը՝ Վարդ: Գերեզմանոցում ընկած է մի արտակարգ գեղեցիկ խաչքարի բեկոր, որի վրա փորագրված է. «Տ[է]ր Յ[իսու]ս. ողորմի է էլպէքի եւ ըՍտէփանոսի յորոյ անուն նշանքս են»: Գերեզմանոցում մի գեղեցիկ որմնափակ խաչքար է կանգնեցված: Խաչքարի արձանագրության սկիզբը ջարդված է և դժվար է ասել շարունակության մեջ հիշատակված Մխիթար վարդապետն է այդտեղ թաղված, թե՞ նա է

²⁸ Գ ր Ե գ ի ն Հ օ վ ս փ յ ա ն, Խաղբակյանը կամ Պոռչյանը հայոց պատմության մեջ, Անթիլիաս, 1969, էջ 262—263:

²⁹ «Ցուցակ ձեռագրաց Մաշտոցի անվան Մատենադարանի», հ. Բ, Երևան, 1970, էջ 344:

³⁰ «Ժ՛ դարի հայերեն ձեռագրերի հիշատակարաններ», էջ 7:

³¹ Հավանաբար նվիրատու Վեցիկը Կեչառիսում շինարարական աշխատանքներ կատարած Վեցիկ ճարտարապետն է: Վեցիկի արձանագրությունը փորագրված է գավթի հյուսիսային պատին, բարձրից: Ահա այն. «[Վե]ցիկ ետու իմ դրամագին.... ի սուրբ ուխտս Թեղենեաց.... կարգեցին Բ ար.... ետ Զատկին շաբաթն.... իմ կատարեն: Կատարիչը արհեստալիցին յԱստուծոյ» (տողերի սկզբնատառերը հողմահարված են):

կանգնեցրել խաչքարը: Արձանագրության թվականը նշող տառերից հարյուր-
քալորը՝ Ո-ն, լացի պահպանված է. տասնավորը տառահեռքով վերականգ-
նրվում է Կ, միավորը կարող է տատանվել Կ-Թ-ի միջև (1—9): Այսպիսով,
խաչքարը կանգնեցնելու թվականը կարող է լինել 1212—1220-ի միջև: Վան-
քի գերեզմանոցում, ի թիվս հոգևոր գործիչների, թաղված է նաև աշխարհիկ
անձնավորություն: Նրա տապանաքարի վրա փորագրված է. «ՁՊատրիկ մե-
ղապարտ ծառա Ք[րիստոս]ի լաշխատհին կարգե յիշէցէք ի Ք[րիստոս]»:



Թեղեկացաց մշակութային օջախի մասին տեղեկությունները դադարում են XIV դարի երկրորդ քառորդից, այն պահից, երբ պատմության թատերաբեմից հեռացան երկրամասի տերերը՝ վանքի հովանավոր Վաչուտյան խոյանները (մոտ 1350—1360-ական թթ.):

Թեև Արմաշի վանքի № 11 ձեռագրում³², որ ստեղծվել է 1597—1604 թթ., խոսվում է նաև Թեղենյաց վանքի մասին, բայց պետք է կարծել, որ այդ ժամանակ այն այլևս նախկին փառքն ու հոյակր չուներ:

МОНАСТЫРЬ ТЕГЕНЯЦ КАК КУЛЬТУРНЫЙ ЦЕНТР

В. М. ПЕТРОСЯНЦ

(Резюме)

Монастырь Тегеняц находится в Наирийском районе, вблизи селения Бужакан (бывш. Бабакиши, историческая провинция Ниг). В монастырский комплекс входили купольная церковь, книгохранилище, два притвора, трапезная и часовня. Здесь жили философы и ученые Киракос Гццакерп (начало XI в.), Саргис Имастасер (XII в.), Вардан Аревелци, Ванакан Вардапет (XIII в.), Акоб или Акобос Вардапет, Мкртич Рабуни (начало XIV в.); учились Геворг Скевраци, Тертер Ереванци и другие. Здесь трудились десятки писцов. Созданные ими книги хранятся в Матенадаране, в Британском музее.

32 Յ. Թ ո ս ի ճ յ ա ն, Յուդակ ձեռագրաց Արմաշի վանքին, Վենետիկ, 1962, էջ 54: